

今

言

今言序

文獻不足杞宋無徵方策尚存文武奉墜  
蓋通今學古非兩事也洛陽少年通達國  
體嘗曰不習爲吏視已成事予有取焉述  
今言三百四十四條藏之故篋中項甥子  
長進士錄而觀之曰周官師典常漢史述  
故事盍與古言並梓之予不能止也

嘉靖丙寅二月旣望鄭曉識

序終

今言卷之一

海鹽鄭曉

一

高皇戊辰生生二十五年入淮西從郭元帥三年起兵渡江明年定建康爲吳國公八年爲吳王四年爲皇帝是年滅胡享國三十有一年建文君洪武丁巳生生六十年而其兄虞懷王卒又十年而其父懿

文太子卒當是時 高皇年六十有五矣

遂立爲太孫七年而嗣帝位四年而亡

成祖生九年而 太祖建國大明又二年

封燕王十年之國北平十九年而靖難三

年即帝位享國二十有三年 仁宗洪武

戊午生年十八封燕世子又四年有靖難

之師又三年 文皇即位即位三年立爲

太子二十年而即位逾年崩 宣宗生四

年而 成祖入南京又九年而爲 太孫  
又十三年爲 太子逾年即位享國十有  
一年 英宗宣德丁未生明年立爲 太  
子又七年即位十四年而北狩明年還京  
師居南宮蓋七年而復辟先後享國二十  
有三年 景皇少 英宗一歲八歲而封  
郕王二十二歲而居守監國遂即帝位八  
年二月崩寔天順元年也 憲宗生 年

而有土木之變立爲太子又三年廢爲

沂王又五年復立爲太子八年而即位

享國二十有四年孝宗成化庚寅生於

西宮越六年而憲宗始知之遂立爲

太子十二年而即位享國十有九年武

宗弘治辛亥生明年立爲太子十三年

而即位享國十有七年今皇帝生於興

邸正德丁卯仲秋也入承大統時視帝堯

自唐戾起爲天子少一歲

二

太祖戊申正月乙亥即 皇帝位詔改是  
年爲洪武元年三十一年閏五月乙酉崩  
於西宮 成祖建文四年六月己巳即位  
詔改明年爲永樂元年革除建文年號仍  
稱洪武以故洪武有三十五年永樂二十  
二年七月庚寅崩于榆木川 仁宗是年

八月丁巳即位詔改明年爲洪熙元年元  
年五月崩於欽安殿 宣宗是年六月庚  
戌即位詔改明年爲宣德元年十年正月  
崩於乾清宮 英宗是年正月癸未即位  
詔改明年爲正統元年十四年八月征胡  
至土木埴狩 景皇時以皇弟封郕王留  
京師奉 孝恭章皇后命監國九月丙子  
即位詔改明年爲景泰元年元年八月

英宗還居南宮景泰八年正月壬午 英

宗復辟詔改是年爲天順元年二月景皇  
崩於西宮天順八年正月 英宗崩於乾

清宮 憲宗是年正月甲戌即位詔改明

年爲成化元年二十三年九月崩於乾清

宮 孝宗是年九月壬寅即位詔改明年

爲弘治元年十八年五月崩於乾清宮

武宗是年五月壬寅即位詔改明年爲正

德元年十六年三月崩於豹房無後四月  
癸卯 今皇帝入繼大統詔改明年爲嘉  
靖元年

三

太祖高皇帝 孝慈高皇后馬氏葬孝陵  
成祖文皇帝 仁孝文皇后徐氏葬長  
陵 仁宗昭皇帝 孝誠昭皇后張氏葬  
獻陵 宣宗章皇帝 孝恭章皇后孫氏

葬景陵 英宗睿皇帝 孝莊睿皇后錢

氏葬裕陵 恭仁康定景皇帝 景皇后

汪氏葬西山 憲宗純皇帝 孝貞純皇

后王氏葬茂陵 孝宗敬皇帝 孝康敬

皇后張氏葬泰陵 武宗毅皇帝 孝靜

毅皇后夏氏葬康陵 英宗側室 孝肅

皇后周氏 憲宗生母也漢文帝詔自稱

朕本高皇帝側室之子云 憲宗側室

孝穆皇后紀氏 孝宗生母也 孝惠皇

后邵氏 獻皇帝生母也 祔葬 二帝陵

先是 孝肅稱太皇太后 孝穆 孝惠

皆稱皇太后 不祔 廟亦不入 奉先

殿別立奉慈殿祀之 今皇帝以太皇太

后皆生時尊稱改稱皇后而不書各帝謚

以別之神位 移陵殿中 睿宗獻皇帝

慈孝獻皇后蔣氏葬顯陵 太祖長子

懿文皇太子懿敬皇太子妃常氏葬孝陵  
左建文君即位追尊爲興宗孝康皇帝孝  
康皇后靖難後仍稱故諡號 懷獻太子  
景皇長子 悼恭太子茂陵長子 哀  
冲太子 莊敬太子皆 今皇帝子

四

孝陵初謚 高皇帝廟號 太祖永樂元  
年六月加謚聖神文武欽明啓運俊德成

功統天大孝高皇帝廟號如故後一百三十六年嘉靖十七年也加上尊謚曰開天行道肇紀立極大聖至神仁文義武俊德成功高皇帝廟號如故長陵初謚體天知道高明廣運聖武神功純仁至孝文皇帝廟號太宗嘉靖十七年加上謚號曰成祖啓天弘道高明肇運聖武神功純仁至孝文皇帝

五

洪武元年立東宮二十五年四月卒是  
年九月立皇太孫永樂二年四月立東宮  
是爲仁宗仁宗永樂甲辰八月即位十  
月立東宮是爲宣宗宣德三年二月立  
東宮是爲英宗英宗正統十四年北狩  
以皇太后詔立東宮景泰三年五月廢  
爲沂王立其子見濟爲太子四年見濟卒

英宗復辟之年三月復立沂王爲太子  
是爲 憲宗憲宗成化七年十一月立悼  
恭太子是年卒十一年十一月立東宮是  
爲 孝宗弘治五年三月立東宮是爲  
武宗 今上十三年八月立袁冲太子是  
年十一月卒十八年二月立莊敬太子二  
十八年四月卒

孝陵仁孝通於天地不肯冒附名族直以

所知 德祖爲始祖德祖生 懿祖懿祖

生 熙祖熙祖生 仁祖仁祖生四子南

昌王盱眙王臨淮王 太祖其第四子也

南昌二子長文正文正生靖江王守謙次

山陽王盱眙生招信王 仁祖有一弟壽

春王壽春四子霍丘王下蔡王安豐王蒙

城王霍丘一子寶應王安豐四子六安王

來安王都梁王英山王諸王俱無後惟靖  
江王分國桂林府禮數如親王

七

高皇二十六子懿文太子秦愍王晉恭王  
成祖周定王楚昭王齊庶人潭王趙王  
魯荒王蜀獻王湘獻王代簡王肅莊王遼  
簡王慶靖王寧獻王岷莊王谷庶人韓憲  
王濟簡王安惠王唐定王郢靖王伊厲王

皇子楠 成祖四子 仁宗漢庶人趙簡

王四皇子 仁宗十子 宣宗鄭靖王蘄

獻王越靖王襄憲王荆憲王淮靖王滕懷

王梁莊王 衛恭王 宣宗二子 英宗

景皇 英宗十子 憲宗榮王三皇子

許悼王德莊王秀懷王崇簡王忻穆王吉

簡王徽莊王 景皇一子懷獻太子 憲

宗十三子悼恭太子 孝宗 獻皇岐惠

王益 王衡恭王雍靖王壽 王八皇子  
汝 王涇簡王榮莊王申懿王 孝宗二  
子 武宗蔚悼王 獻皇二子岳懷王  
今皇帝今皇帝 子哀冲太子莊敬太子  
裕王景王穎劻王薊哀王威懷王均思王

八

熙祖祖陵在泗州基運山奉祀朱氏宗人  
嬀也 德祖 懿祖就祖陵而董祭焉

仁祖英陵改皇陵在中都岵聖山奉祀二人劉氏汪氏祀丞二人汪氏趙氏劉即義惠侯孫二汪皆汪氏老母孫 太祖孝陵在南京神烈山 成祖至 武宗諸陵在昌平天壽山 睿宗顯陵在承天純德山 都督蔣華奉祀華慈孝睿后家也天壽山即黃土山 成祖所賜名四山嘉靖中賜名

九

太祖實錄三修建文君即位初修王景充  
總裁靖難後再修總裁解縉縉得罪後三  
修總裁楊士奇初修再修時士奇亦秉筆  
十

洪武六年定府爲三等賦二十萬石上爲  
上府知府從三品二十萬下中府正四品  
十萬下下府從四品已乃並爲正四品吳

元年定縣三等賦十萬石以下爲上縣知縣從六品六萬以下中正七品三萬以下下從七品已乃並正七品京縣正六品

十一

懿文太子五子虞懷王建文君吳王衡王徐王靖難改封吳衡徐王爲廣澤懷恩敷惠王敷惠又改封甌寧王建文君二子太子文奎少子文圭

十二

太祖取南都自太平順流而下 成祖入  
南都自儀真逆流而上隋氏平陳兵分兩  
道上游廬州總管下流揚州總管 成祖  
南來以淮安廬陽各有重兵間道自泗州  
渡淮經天長至江上

十三

洪武三年封建詔第五子封吳王後人見

五子之爲周王也改吳爲周而不知周王  
初封杭州爲吳王也 孝陵以浙江財賦  
地改吳王封開封爲周王已而建文君封  
其第二弟允熲爲吳王非 祖法矣周是  
修爲衡府紀善人以爲孝陵諸子無衡王  
改爲衡王而不知建文君第三弟允熾之  
封衡王也衡王乃 獻陵第十子周死靖  
難時衡王尚未封 茂陵第五子亦封衡

王

十四

洪武十一年禁六部奏事不得關白中書省又明年殺右丞相胡惟庸遂罷中書省

十五

小說言 懿文太子薨 孝陵意不欲立孫遲回久之 高皇后不說因遘疾崩於 是孫始得立此妄說也洪武壬申四月丙

子懿文太子薨是年九月庚寅詔立孫允  
炆爲皇太孫太子卒後未半年當是時  
高皇后崩已十一年矣

十六

紀元有號起於漢武帝至今千數百年正  
統分裂僭逆不知凡幾紀元一帝一紀元  
實自洪武始然亦有同于前者張重華王  
則皆永樂元出帝天順夏崇宗正德唐高

祖太宗止武德貞觀一紀元

十七

恭仁康定景皇帝初封爲郕王正統十四  
年七月茂陵北征王居守坐闕左門西面  
見群臣八月茂陵北狩皇太后詔立其  
長子爲皇太子郕王監國坐午門攝朝廷  
臣班劾王振監國倉卒未有處分廷臣大  
哭錦衣指揮馬順振黨也叱且退臺諫王

竝等憤捽順捶死且索毛王二長隨二長  
隨亦黨振廷中大譁監國起且退兵部侍  
郎于謙趨上掖監國止頓首曰請殿下坐  
監國復坐問曰爾意云何謙進前密對數  
語頓首下監國遂曰百官前振罪當赤族  
予請 太后行誅未晚順罪亦應誅今擊  
死勿論又令左右縛二長隨至立命將軍  
瓜擊二長隨死命都御史陳鎰籍振家玉

盤徑尺者十四珊瑚樹高六七尺者十數  
金銀十餘庫馬數萬匹誅振姪錦衣指揮  
山夷其族移監國入坐奉天門左以謙爲  
兵部尚書翰林侍讀彭時商輅入內閣九  
月丙子監國以太后命即皇帝位詔改  
明年爲景泰元年大赦天下遙尊茂陵爲  
太上皇帝尊皇后錢氏爲太上皇后虜  
遣使致書書詞悖慢答書言中國已立

皇帝天下兵力強盛行當決戰以羅通孫  
祥爲副都御史守居庸紫荊關勅翰林侍  
講徐瑄等十五人分鎮要害糾合義旅防  
護京師是秋虜脫脫不花寇遼東不樂出  
寇陝西都指揮岳謙至虜營虜知中國立  
皇帝十月也先殺馬大宴復尊上皇爲  
天子行賀禮曰將奉天子還京也喜寧導  
也先詔上皇還京遂入紫荊關孫祥走

死京師戒嚴于謙上禦虜方畧出石亨楊  
洪於獄中以爲總兵官以王通爲都督及  
鴻臚卿楊善守京城孫鏗衛穎范廣張義  
張軌雷通分兵守戰監以侍郎江淵給事  
中王竑葉盛程信亨洪安遠侯柳溥統兵  
出戰盡移郭外人入城令虜所過堅壁清  
野固守勿與戰急散官軍通州糧百萬入  
都城盡焚都城外積芻十一日也先擁衆

至城下謙及亨統兵出禦虜虜見我師堅  
不可撼喜寧嗾也先邀謙及王直胡濙五  
六大臣出議和索金帛萬萬計衆皆知虜  
詐不出以通政司叅議王復爲禮郎中書  
舍人趙榮爲鴻臚卿出見 上皇即辭歸

虜逼京城謙亨出德勝門閉門對壘約戰  
以 上皇在虜中未敢輒動已諜知虜移  
上皇西我發大炮擊虜虜死炮下者數

千人斬其酋鐵頸元師亨及其姪彪又戰彰義門清風店皆捷也先稍却謙請大出聖旨榜文潛遺虜營中諭回達奚漢有能擒斬也先來獻者賞萬金封國公疑虜十六日也先出居庸伯顏帖木兒奉上皇出紫荆洪鐘廣等又擊虜於涿州紫荆固安虜敗去自是不敢深入論功加謙少保總督軍務尚書如故亨封武清伯燕太

子太師提督京營洪復封昌平伯彪遊擊  
將軍以都督郭登都御史任寧守大同尚  
書石璞侍郎劉璉都督朱謙守宣府都御  
史羅通都督范廣守山西朱鑑守雁門都  
御史王翱守遼東王文陳鑑劉廣衡更出  
守陝西王通守天壽山鄒來學爲僉都御  
史提督京東軍務左都御史沈固出大同  
叅謀軍事平江侯陳豫鎮守臨清

十八

永樂初內閣儒臣考滿陞任不必在內閣  
如胡若思出爲祭酒以故永樂五年十一  
月長陵論蹇太宰曰胡廣等侍朕日久  
繼今考滿勿改外任

十九

長陵三子長獻陵次漢庶人次趙王庶  
人名高與有膂力善騎射靖難時屢有戰

功江上之急庶人戰尤力淇國公輩皆附  
庶人庶人欲奪適者數矣以故東宮諸臣  
多得罪死解學士亦以是死詔獄先是永  
樂二年封庶人雲南不肯去改青州又不  
肯去留京師遂有逆謀十四年事露削護  
衛改封樂安即日遣之國宣德元年八月  
壬戌朔反丁卯令其百戶陳剛進疏指斥  
朝廷上遂親征急遣平江伯陳恭襄公

守淮安勿令賊走南京辛未駕發京師樂  
安知州朱恒勸庶人直趨南京賊黨皆  
言恒應天人不可聽庚辰先鋒武陽侯至  
樂安辛巳駕至樂安壬午庶人潛出見  
上八月乙酉班師庶人至京鎖繫逍遙城  
一日上過視庶人庶人犯上覆之銅  
缸焚死

二十

乙未正月 孝陵至和陽郭元帥暴卒四月開平王始來謁 孝陵遂不受小明王韓林兒僞命渡江克太平稱大元帥七月攻集慶八月又攻集慶九月又攻集慶皆不克明年二月破元兵於采石三月始克集慶集慶今南京也

二十一

成祖起自北藩征誅而得天下壬午年即

位後一百二十年 今皇帝起自南藩揖讓而有天下壬午年改元

二十二

靖難兵未起時中朝已有備江陰侯吳高兵十萬屯遼東都督朱忠兵十萬屯懷來都督徐凱兵十萬屯河間而張壽謝貴在北平城中長興侯耿炳文又統兵三十萬至真定何以兵起竟敗塗地瓦解謂非天

命歟

二十三

康陵前皆一帝一后  
洪武十五年永樂五  
年中宮崩皆不復立繼后  
今皇帝元后  
孝潔皇后陳氏繼廢后張氏皆葬西山  
又繼 孝烈皇后方氏葬永陵

二十四

成祖靖難用兵出入四年所破郡縣皆不

設官守諸郡縣亦不肯歸附旋破旋守惟  
得北平保定二府

二十五

南京承天門建文二年秋災復建改名臯  
門因改午門爲端門端門爲應門大明門  
爲路門又改謹身殿爲正心殿先是又於  
乾清坤寧二宮間建省躬殿

二十六

國朝小說書數十種中亦有浪傳不足信者惟野錄中一事極可惡 獻陵洪武十一年生于鳳陽 長陵入金川門時 獻陵守北平年已二十五景陵建文元年二月生於北平 獻陵得子最早年二十九歲已有六人凡十子 成祖愛景陵時時稱太孫英武類我 景陵擒漢庶人詔有誣妄先帝爰及朕躬語好事者爲野錄遂

妄言耳

二十七

洪武十五年都督僉事李新以營 孝陵  
功封崇山侯王通以父真靖難元功又自  
立功封武義伯永樂七年作天壽山十三  
年進封成山侯 獻陵以通父侑享 太  
廟通後以交趾失律爲民天順元年詔恩  
通子琮得嗣成山伯

二十八

洪武八年初定親王歲祿五萬石錦綺鹽  
茶又萬計靖江亦歲二萬石二十年停錦  
綺茶鹽諸物二十八年始定歲萬石先是  
孝陵諭戶書郁新曰朕今子孫衆盛歲  
祿五萬石天下官吏軍士多俸給彌廣其  
斟酌古今稍節減諸王歲給以資乏用故  
也是年遣使召諸王至京諭減祿之故各

賜 皇明祖訓祖訓即祖訓錄也

二十九

嘉靖庚戌冬 孝烈皇后祔廟祧 仁皇

帝后時廟一堂九室帝 太祖左四室

成祖 英宗 孝宗 武宗 右四室

宣宗 憲宗 睿宗 孝烈皇后

三十

洪武開科詔五經皆主古註疏及易兼程

朱書蔡詩朱春秋左公羊穀梁程胡張禮  
記陳乃後盡棄註疏不知始何時或曰始  
于頒五經大全時以爲諸家說優者采入  
故耳然古註疏終不可廢也

三十一

寧庶人者康王庶子其母馮針兒故媼也  
弘治八年封上高王十二年嗣王正德十  
四年六月丙子反攻陷九江南康七月壬

辰攻安慶知府張文錦守將崔文揚銳拒  
守甚力庶人窘議僭大號改年順德其僞  
太師國師李士賓劉養正言須至南京即  
位改元庶人不悅又攻安慶不克將還南  
昌丙午聞王陽明入南昌解安慶圍去乙  
卯遇陽明兵於黃家渡戰敗丙辰又敗丁  
巳陽明督戰益急庶人妃婁氏投水死擒  
庶人婁妃知庶人逆謀時時泣諫不聽庶

人敗嘆曰紂用婦言亡而我不用婦言亡

三十二

七王府齊王博也 孝陵第七子洪武三

年封青州建文中謀反執之京師降庶人

與周定王皆繫禁靖難兵至得釋復國人

告王有反謀 上與書戒諭永樂四年來

朝謝廷臣劾王留京師出怨言召其三子

郡王至京父子皆降庶人已而安置廬州

宣德三年福建人樓璉妄稱七府小齊王  
謀不軌逮至京誅數百人景泰五年移庶  
人少子賢懌居南京勅守備叅贊防閑勿  
令與諸人親王往來交通今南京有齊庶  
人者皆懌後

三十三

孝陵第十八子谷庶人母郭惠妃滁陽王  
女也封宣德府即今宣府古上谷靖難兵

起庶人走還京後開金川門逆靖難兵改封長沙忠誠伯以不謁王下詔獄死庶人益驕有反謀永樂十四年十月召至京明年降爲庶人少子賦歛與賢赫同自廬州徙南京卒無後

三十四

詔恩各從其類上 慈闈徽號則有封贈 父母恩立 東宮則有廕子入監恩災異

脩省則有蠲逋減刑恩 登極則大赦矣  
立 中宮及 東宮出閣皆無恩例若建  
大工平大賊誅大奸亦有詔皆以類行惟  
蠲逋減刑每詔有之 九廟災時議下詔  
寬卹至有欲褻親廢子者繆矣

三十五

山西安邑全寅少瞽學易卜筮以京房斷  
占輒奇中正統中隨父清大同 裕陵址

符令大同守闔裴當問全筮得乾之復寅  
密附奏曰大吉夫四初應也初潛四躍明  
年歲在午其干庚午躍候也庚更新也龍  
歲一躍秋潛秋躍浹歲也明年秋駕當復  
矣繇勿用應或之或之者疑之也還而復  
也幽然象龍也數九也四近五躍近飛龍  
在丑丑曰赤奮若復在午午色赤也午奮  
于丑若順也天順之也其干丁象大明也

位于南火方也寅其生也午其王也壬其  
合也其復辟也其當九年之後歲丁丑月  
寅日午合於壬乎 裕陵心識之寅至京  
也先犯京城將官召寅筮曰虜無能爲彼  
驕我驍戰必勝虜果敗庚午也先行成朝  
議未堅決寅勸石亨協謀于少保迎駕駕  
至以 太上皇居南城已而錦衣使盧忠  
上變告密筮寅所寅佯不知者驚曰是何

占也而凶若是不滅族且殺身禍已種矣  
柰何忠大懼狴狂事得不竟忠卒坐誅丁  
丑正月壬午駕出南城登極召欲官寅辭  
乃範金陰陽神靈四字爲筮錢十有八貯  
之牙盒賜之會清以指揮出莅徐州上  
留寅京師授錦衣百戶寅又辭不允時石  
大貴幸寅每筮戒以持滿石不悟及禍公  
卿大夫喜接寅寅語不及私大抵抑邪與

正極人顛阮年九十卒

三十六

永樂元年二月以北平爲北京設行部行  
府改北平府爲順天府從禮部尚書李至  
剛之請也

三十七

丁未以信國公達爲征虜大將軍鄂國公  
邁春爲副將軍帥師北定中原二年秋遇

春卒三年春以達爲征虜大將軍文忠勝  
左右副將軍愈和左右副副將軍北伐六  
年五將軍統兵備山西北平諸塞當時蓋  
有副將軍又有副副將軍後遣征南諸將  
以叅將代副副將軍

三十八

永樂五年平交趾露布臣總兵官新城侯  
張輔等謹以所獲交賊僞大虞國上皇黎

季犛僞大虞國主黎蒼賊男僞推誠守正  
翊贊弘化功臣雲屯鎮兼歸化等鎮嘉興  
等鎮諸軍事節度大使洮江管内觀察處  
置等使持節雲屯歸化嘉興等鎮諸軍事  
領東路天長府路大都督府特進開府儀  
同三司入內檢校左相國平章軍國事賜  
金魚袋上國柱衛國大王黎澄僞大原鎮  
兼天開鎮驃騎上將軍楚國王黎激僞新

安鎮驃騎大將軍新興郡王黎汪賊孫僞  
太子黎芮僞郡嗣王黎滷僞郡亞王黎范  
幼孫五郎賊弟僞臨安鎮兼太安海鎮驃  
騎將軍特進開府儀同三司入內相國平  
章事賜金魚袋上柱國唐林郡王黎季胤  
賊姪僞望江鎮輔國大將軍入內判中都  
督河陽郡亞公黎原咎僞領龍興路統府  
平陸縣上侯黎子緯賊姪孫僞御輦一局

正掌鄉侯黎

叔

僞清亭侯黎伯駿僞石塘

鄉侯黎廷焯僞永祿亭侯黎廷燠賊將僞

入內僉聞朝政兼內侍省都知知左班事

蘇山鎮權僉行軍行諒江路同知總管府

事賜金魚袋柱國東山鄉侯胡社僞入內

行遣同知尚書左司事樞密院副使阮彥

光僞正奉大夫入內行遣門下左諫議大

夫同中書公事兼三江路太守新安鎮封

置使國子學祭酒賜金魚袋護軍黎景琦  
僞寧衛將軍知威衛管左登翊軍賜金團  
符縣伯段輦僞神勁營亭伯陳湯夢僞鈞  
鈴衛中郎將領龍捷軍兼領壯勇營范六  
材謹差都督僉事柳升橫海將軍魯麟神  
機將軍張勝都指揮僉事俞讓指揮同知  
梁鼎指揮僉事申志檻送京師并其僞造  
金印圖書一十六顆獻之闕下

三十九

宣德二年行在吏部言自永樂十九年迄今遣回庶官四千三百十九人居鄉往往不循分守構詞健訟持官府短長請悉召至京考驗才能可用者以次敘銓否罷爲民

四十

永樂中獻陵監國南京長陵時時址征有

所宣制 天子用廣運之寶曰勅 皇太子用皇太子寶曰諭選武官選簿 御前亦用廣運寶 東宮用功懋之記

四十一

洪武辛亥有進士永樂癸未無進士天順癸未亦然永樂初即位天順南省火皆以明年甲申會試永樂己丑 長陵址征又明年殿試故有辛卯進士正德庚辰 康

陵南巡明年 新天子自興邸入即位故  
有辛巳進士又明年癸未遂有進士我朝  
百六十年癸未惟一舉

四十二

李文達公天順日錄云八月十五日之變  
天下聞之驚懼不寧賴 今上皇帝以太  
弟即位尊兄爲 太上皇人心始安又云  
景泰不孝於親不敬其兄不韋其寧朝廷

之上怨恨憂鬱災徧天下前後何不類如此

四十三

朱字傳帖者 奉天門朝罷 駕興司禮  
巨璫持下丹陛呼該衙門官與之次日早  
朝該衙門官具奏本 御前奏云傳奉事  
理補奏本鴻臚寺官接遞司禮小璫進覽  
墨字傳帖則出自順門付該衙門奏行不

復面繳若事未穩便須執奏者固不問朱墨也

四十四

我朝之有內閣輔臣自解大紳始也輔臣之繫詔獄也亦自解始也其有謹身殿大學士也自東楊始也輔臣之歷官至一品也自西楊始也官至一品入內閣也自王毅愍始也一人領四官也亦自王始也其

論死西市也亦自王始也輔臣如東西楊皆領三官陳芳州高文義領五官矣然皆領戶工尚書其領吏部尚書亦自王始也西楊兵部東楊工部終其身也自王以後多吏部矣輔臣之有少師自西楊始也西楊卒而少師虛位者四十餘年萬安亦登少師博野繼之自後洛陽長沙新都順德丹徒鉛山永嘉貴溪分宜皆少師矣吏部

尚書之領太子太保也自詹徽始也詹坐  
藍黨死其登少師也自蹇忠定始也文端  
端肅恭襄皆少師也漕運之有都御史也  
自王莊毅始也兩廣之有總督文臣也自  
忠肅始也鄭陽之有撫治也自原傑始也  
江南之有巡撫也自周文襄始也汀漳撫  
臣之得提督軍務也自王陽明始也叅政  
之贊理軍務也自葉文莊始也治河之有

大臣自宋司空始也陝西之有鎮守憲臣也自王毅愍陳僖敏始也二公在內臺歲更出鎮也巡撫之必兼憲職也自耿清惠始也

四十五

洪武中中山王初封東甌王進封皆信國公忠勤伯二人洪武汪廣洋洪熙李賢新建伯二人宣德李玉嘉靖王陽明外戚安

平伯三人景泰母家吳安 孝烈皇后父  
方銳永樂功臣李遠封安平侯子安嗣安  
平伯

四十六

南京中府守備廳題名記一李克嗣一喬  
宇二公名通今之士李記云 太宗遷都  
皇孫監國而不知 成祖時監國乃

太子非 太孫也是時 仁宗爲太子監

國南京 宣宗爲太孫從行撫軍監國

京 仁宗初即位 宣宗爲太子 洪熙元

年四月以南京地屢震令 太子祭告皇

陵孝陵爲名實有監國南京之命喬記云

永樂乙巳詔以勲舊重臣鎮守而不知永

樂二十二年甲辰八月 帝崩明年乙巳

乃洪熙元年也近日尚寶司題名碑張文

隱公文甚佳下書少卿首媿繼次袁忠徹

是矣繼下書文敏公夔之子浙江建德縣人不知繼乃恭靖公廣孝之嗣子長洲市中也文敏公正統七年進士父以正統舉進士而其子乃永樂中恩蔭爲少卿此不足辨直可發一笑耳文敏三子璧瑩璽

四十七

南雍志祭酒黃佐所修載弘治元年諫官張九功奏言孔庭從祀荀况馬融王弼楊

雖皆在所當出今之儒臣禮部侍郎蕪翰  
赫學士薛瑄在所當入 上命禮部會議  
於是尚書周文安公等僉言楊雄已黜於  
洪武時而薛瑄嘗與元儒劉因竝欲從祀  
以大學士楊士奇謂其無所著述而止文  
貞卒於正統九年文清天順元年正月入  
內閣六月致仕天順八年卒何謬至此

國初謚美惡兼用洪武二十二年魯王卒

上諭禮部尚書李原名曰父子天性謚

法公義朕不得以私恩廢公義可謚曰荒

永樂六年伊王謚厲洪熙元年上命禮

部尚書呂震諭翰林定故兵書兼詹事金

忠等十八人謚內有通政使賀銀謚不美

上曰此數人皆在先朝盡心國事有德

行重厚表裏一致者有涉歷艱難始終一

心者必加旌褒庶幾禮賢厚終之道但朕  
意未嘗及銀銀勞可贈官行不應美謚若  
加銀惡謚又不若無謚人不得議焉古人  
制謚正爲定論美惡示至公也銀竟不謚

四十九

于肅愍公神道碑倪文毅公作倪公第阜  
于公孫婿也碑文以虜入寇京城爲景泰  
元年以上皇還京爲辛未年辛未景泰

二年也虜至德勝門寔正統十四年十月  
事 上皇入南宮寔景泰元年八月事此  
名臣大功業儒臣大制作尚爾舛誤金石  
之刻豈足盡信

五十

國初立大都督府皇姪文正爲大都督節  
制中外諸軍事以其權太重尋設左右都  
督都督都督僉事洪武十三年又以其權

統於一衙門設中左右前後五軍都督府分領在京各衛所在外都司衛所其在京錦衣等親軍上直衛又不隸五府若有征討之役以公侯伯及三等真署都督充總兵官名曰掛印將軍其在外鎮守地方武臣原無掛印至洪熙元年二月始頒各鎮總兵叅將佩印總兵六人雲南黔國公沐晟征南將軍大同武安侯鄭亨征西前將

軍廣西鎮遠侯顧興祖征蠻將軍遼東武  
進伯朱榮征虜前將軍宣府都督譚廣鎮  
朔將軍甘肅都督費瓛平寇將軍叅將四  
人交趾榮昌伯陳智都督方政征夷副將  
軍寧夏保定伯梁銘都督陳懷征西將軍  
後設薊州淮安總兵皆在畿內不得掛印  
稱將軍京營操練之法洪武時止爲五軍  
營分大小教塲與城外城內操練永樂初

分爲三大營曰五軍營有步隊馬隊專教陣法曰神機營皆步隊肄習火器曰三千營皆馬隊專扈從出入管車輦寶纛等事每營以公侯伯二人充提督某營總兵官景泰三年于肅愍公建議立團營揀三大營中壯健士卒團練就於三營六提督中揀二人充提督團營總兵官即於五府中蒞事文臣提督以兵部尚書是年團營總

兵武清侯石亨遂請故都察院改爲帥府  
天順元年罷團營成化元年復立團營尋  
罷成化三年又復團營團營之兵名爲頭  
撥初團營分爲十營後增爲十二營一營  
以侯伯都督等官一人爲坐營官有事出  
征不必揀選但撥某營出征則某營將領  
其營士卒啓行承平日久團營非復操練  
之舊又立東西官廳名爲聽征蓋三營變

爲圖營團營變爲東西廳也 祖宗微意

不欲武臣權重在內營操官止管操練者  
無開設衙門亦無印信在內五府有衙門  
印信理常行政務至於營操非特命不得  
干預蓋五府三營十二營職掌不相侵也  
至於出征亦不止大將一人必選二三人  
名位謀勇相等者相參用之出師之日賜  
平賊討賊平虜平胡征夷征虜等印或將

軍或副將軍或大將軍隨時酌與必由兵部題請五府亦不得干預事平之日將歸於府軍歸於營印歸於朝其意深矣今考洪武三年征胡以信國公徐達爲征虜大將軍平章李文忠右詹事馮勝爲左右副將軍御史大夫鄧愈湯和爲左右副將軍是時達未封魏國公文忠曹國公勝宋國公愈衛國公和中山侯皆未封也四年

伐蜀以中山侯湯和爲征西將軍江夏侯  
周德興德慶侯廖永忠爲左右副將軍入  
瞿塘潁川侯傅友德爲征虜前將軍濟寧  
侯顧時爲左副將軍出秦隴永樂四年征  
安南以成國公朱能爲征夷將軍西平侯  
沐晟新城侯張輔爲左右副將軍是時晟  
未封黔國公輔未封英國公永樂十二年  
征胡安遠侯柳升領太營都督馬旺陳翼

程寬金玉副之寧陽侯陳懋左哨襄成伯  
李隆都督朱崇副之豐城侯李彬右哨遂  
安伯陳瑛都督費瓛胡原副之成山侯王  
通左掖保定侯梁瑛都督曹得副之都督  
譚清左掖新寧伯譚忠都督馬震副之是  
時上親征故不立將軍綱之號宣德五  
年禦胡以陽武侯薛祿爲鎮朔大將軍總  
兵官恭順侯吳克忠爲副總兵武進伯朱

冕奉化伯藤定爲左右叅將此意又非但欲分其權蓋亦難其人以一將將十萬其材豈易得哉嘉靖庚戌虜窺京師 朝廷厘革營務罷團營仍爲五軍營內分十二小營改三千營 爲神樞營神機營仍舊三營共設總督京營戎政公侯伯一人協理文臣一人五軍營副將二人練勇叅將二人叅將四人遊擊將軍四人神樞神機

營各副將一人練勇參將二人佐擊將軍  
六人以昌國公故宅爲戎政廳給戎政之  
印柳葉篆文虎鈕如將軍所掛印通計京  
操凡大營三內分爲小營三十副將以下  
三十人人坐一營副將用真署都督參遊  
佐擊用真署都指揮或都督大抵統軍不  
專於一人練軍不專於一人行軍不專於  
一人皆有意焉

五十一

洪武三年冬儒士魏俊民黃箎劉儼丁鳳  
鄭思先鄭權上 大明志命秘書監梓行  
授俊民等官先是 上令俊民等類編天  
下州郡地理形勢降附始末爲書凡行省  
十二府一百二十州一百八縣八百八十  
七安撫司三長官司一東至海南至瓊崖  
西至臨洮北至北平六年令州府繪上山

川險易圖十六年詔天下都司上衛所城池地理山川關津亭堠水陸道路倉庫十七年令朝覲官上土地人民圖十八年夏上覽輿地圖侍臣有言輿地之廣古所未有者上曰地廣則教化難周人衆則撫摩難徧此正當戒慎天命人心惟德是視紂以天下而亡湯以七十里而興所係在德豈在地之大小

五十二

永樂至正統間諸老臣在政地既久且專  
忠定秉銓忠靖握利權皆二十七年忠宣  
尚書兩京三十九年而在交南者十有九  
年忠安爲禮部尚書三十二年文襄巡撫  
江南二十二年以故用人理財禮樂征伐  
諸大政文經武緯各盡其長章程故在後  
鮮能及

五十三

洪武三十五年 文皇即位開內閣召七  
臣入預機務名直文淵閣蓋自壬午至嘉  
靖百六十年間凡六十八人直隸十人南  
直隸八人浙江八人江西十六人河南七  
人山東四人福建二人湖廣四人四川四  
人山西一人廣東三人廣西一人

五十四

異姓追封王者楊王徐王滁陽王皆外戚  
天造之初滁陽又有先路之功諸功臣家  
徐氏中山王常氏開平王李氏岐陽王鄧  
氏寧河王湯氏東甌王沐氏黔寧王定遠  
王張氏河間王定興王寧陽王公朱氏東  
平王平陰王 朱氏宣平王岐陽父隴西  
王凡十四人以子孫王推恩追封者不與  
焉又有降虜也先土干賜姓名金忠封忠

勇王

五十五

正統己巳孟冬虜犯京城石亨欲盡閉九門以待勤王之兵于肅愍公力爭請同亨率兵出營德勝門外與虜對壘已而虜被我砲擊死者近萬人大沮退石亨奮欲擣擊肅愍公又力爭縱虜令北去出戰所以護京師縱虜所以安上皇也

五十六

吳元年太史院使劉文成公率其屬高翥  
等上戊申大統曆洪武元年改院爲司天  
監又置回回司天監是年十一月徵元太  
史院使張佑張沂司農卿兼太史院使成  
隸太史同知郭讓朱茂司天少監王可大  
石澤李義太監趙恂太史院監候劉孝忠  
靈臺郎張容回回司天監黑的兒阿都刺

司天監丞迭里月實十四人二年又徵元  
回回曆官鄭阿里等十一人至京議曆法  
占天象三年定爲欽天監掌察天文定曆  
數

五十七

洪武二十七年寰宇通衢書成書分爲八  
目東距遼東都司又自遼東東北至三萬  
衛西極四川松藩衛又西南距雲南金齒

南踰廣東崖州又東南至福建漳州府址  
暨北平大寧衛又西北至陝西甘肅爲驛  
九百四十浙江福建江西廣東之道各一  
河南陝西山東山西北平湖廣廣西雲南  
之道各二四川之道三爲驛七百六十六  
凡天下道里縱一萬九百里橫一萬一千  
七百五十里四夷之驛不與焉

五十八

外夷封王如朝鮮安南占城海島諸國來  
朝貢者各以其國名封惟琉球封中山山  
南山北三王今存中山王北虜封王者四  
人韃靼阿魯台和寧王瓦剌馬哈木順寧  
王太平賢義王把禿字羅安樂王西域二  
人哈密惠順王阿端安定王西番七人正  
覺大乘法王如來大寶法王闡化王闡教  
王輔教王贊善王贊化王

五十九

內官之制定於洪武二十八年凡監十一  
曰神宮曰尚寶曰陵神宮曰尚膳曰尚衣  
曰司設曰內官曰司禮曰御馬曰印綬曰  
直殿凡門四曰奉天門曰午門曰端門曰  
承天門凡司二曰鐘鼓曰惜薪凡局六曰  
兵仗曰內織染曰針工曰巾帽曰司苑曰  
酒醋麪凡庫三曰內承運曰司鑰曰內府

供應其正官監有太監門有門正皆正四  
品司有司正局庫有大使皆正五品洪武  
三十年增都知監銀作局東宮六局曰  
典璽曰典藥曰典膳曰典服曰典兵曰典  
乘各正官局郎正五品王府承奉司典寶  
典膳典服三所各有正官正六品又有內  
使門正公主府中使司司正司副皆雜職

洪武五年 上令定女職禮部具陳周制  
後宮設內官以贊內治漢設內官一十四  
等凡數百人唐設六局二十四司官凡一  
百九十人女使五十餘人皆選良家女充  
上曰古者所設過多宜防女寵垂法將  
來命重加裁定遂立六局一司局曰尚宮  
尚儀尚服尚食尚寢尚功司曰宮正俱正  
六品尚宮總司紀司言司簿司闈尚儀總

司籍司樂司賓司贊尚服總司寶司衣司  
仗司飾尚食總司饌司醢司藥司供尚寢  
總司設司輿司苑司燈尚功總司製司珎  
司綵司計凡二十四司宮正掌戒令責罰  
之事二十二年令六尚局官服勞旣多或  
五載六載歸其父母從宜婚嫁年高者許  
歸以終天命願留者聽其在宮闈及見受  
職者家給與祿視外品

六十一

建文時改官制陞六部尚書正一品設左  
右侍中各一人位侍郎上諸司去清吏字  
改戶部爲民度支金帛倉庾四司刑部爲  
詳憲比議職門都官四司罷左右都御史  
設都御史一人副僉都御史各一人又改  
都察院爲御史府設御史大夫正二品革  
十二道置察院一定御史二十八人改諸

御史爲拾遺補缺改通政司爲寺通政使  
爲通政卿通政少卿參議寺丞增置左右  
補缺左右拾遺各一人復大理寺改爲司  
又改卿爲大理卿左右寺正都評事寺副  
副都評事司務都典簿太常寺改卿爲太  
常卿少卿寺丞分左右天壇祠祭署爲南  
郊祠祭署泗州祠祭署爲泗濱祠祭署宿  
州祠祭署爲新豐祠祭署孝陵置鍾山祠

祭署及司園所增神藥觀知觀一人光祿  
寺改卿爲光祿卿少卿寺丞如太常而陞  
少卿從四品省署丞二人增監事二人太  
僕寺改卿爲太僕卿增典廐典牧二署設  
驕驥十五群遂生三群分隸二署詹事府  
增少卿寺丞各一人賓客二人又置資德  
院設資德一人資善二人其屬贊禮贊書  
著作郎各二人掌籍典簿各一人國子監

陞監丞爲堂上官增司業二人省博士學  
正學錄增助教十七人鴻臚寺改卿爲鴻  
臚卿少卿寺丞如光祿而并行人司於鴻  
臚寺翰林院增學士承旨一人學士一人  
設文學博士二人省侍講侍讀學士置文  
翰文史二館文翰館設侍書改中書舍人  
爲侍書文史館設脩撰編修檢討而以方  
孝孺爲文學博士又改謹身殿爲正心殿

設學士一人罷華蓋文華武英三殿文淵  
東閣太學士各設學士一人待設無定員  
文淵閣設典籍一人六科罷左右給事中  
改中東西南北城兵馬指揮司爲五城兵  
馬司指揮副指揮爲兵馬副兵馬始置京  
衛武學教授一人啓忠等齋各訓導二人  
布政司革左右布政使設布政使一人堂  
上官各陞品一級改提刑按察司爲十三

道肅政按察司廣東鹽課司爲廣東都轉  
運鹽使司罷北平山東河南山西陝西五  
省及江址學校貢士革五府左右斷事官  
五軍斷事司增親王宮賓輔二人正三品  
伴讀伴講伴書各一人長史一人左右長  
史各一人審理正典膳正奉祀正良醫正  
典寶正並去正字審理副等改爲副審理  
等郡王賓友二人正四品教授一人記室

二人直史一人左右直史各一人吏目一人典印典祠典禮典饌典藥五署典印典祠典禮典饌典藥各一人典儀二人引禮舍人二人儀仗司吏目一人賓輔三伴賓友教授進對侍坐稱名不稱臣見禮如賓師靖難後復洪武舊制惟存大理寺不設斷事官及斷事司正統中復設京衛武學

六十二

公侯伯爵凡三等以封功臣皆有流有世  
並給鐵券高廣凡五等號凡三等佐 高  
皇定天下曰開國輔運云云佐 成祖曰  
奉天靖難云云餘曰奉天翊運云云其武  
臣也曰宣力功臣文臣曰守正文臣歲祿  
視功有差多不過五千石已封而又有功  
者仍爵或進爵加祿其才而賢也充團營  
二營提督總兵坐營官五府掌印僉書留

都守備出充總兵官鎮守否食其祿其襲  
替徵券誥論功過覈適孽幼而嗣者學於  
國子監有過革冠服平巾學於國子監坐  
罪奪祿重奪爵

六十三

永樂十六年詔纂天下郡縣志命夏忠靖  
楊文敏金文靖三公領其事景泰中修寰  
宇通志准祝穆方輿勝覽葉文莊公曰此

趙宋偏安之物况直爲四六設今欲成盛  
代一統之書宜有資軍國益勸戒如地理  
戶口類不可缺必如永樂中志書凡例充  
廣之可也陳芳洲笑曰此豈造黃冊耶天  
順五年撰

大明一統志

六十四

永樂六年定輿定遠二王上交趾地圖東

西一千七百六十里南北二千八百里乃郡縣其地設都布按三司分十七府曰交州北江諒江三江建平新安建昌奉化清化宣化太原鎮蠻諒山新平又安順化升華四十七州一百五十七縣衛十一所三市舶司一改鷄陵關爲鎮夷關

六十五

彭惠安公哀江南詞敘述建文死義之臣

至方遜志乃云後來奸佞儒巧言自粉飾  
叩頭乞餘生無乃非直筆蓋指西楊輩修  
實錄書方再三叩頭乞生者非實事也

六十六

靖難之歲十一月副都御史陳瑛言 皇  
上順天應人以有天下四方萬姓莫不率  
服然車駕初至京師有不順天而效死建  
文者如禮部侍中黃觀太常少卿廖昇翰

林修撰王叔英衡府紀善周是修浙江按察使王良沛知縣顧伯瑋等計其存心與叛逆同宜從追戮 上曰朕初舉義誅姦臣不過數輩後來二十九人中如張統王鈍鄭賜黃福尹昌隆皆宥而用之今汝所言數人况有不與二十九人之數者彼食其祿自盡其心悉勿問

歷代帝王廟歲仲春秋 皇帝遣大臣祭

太昊伏羲氏炎帝神農氏黃帝軒轅氏帝

金天氏帝高陽氏帝高辛氏帝陶唐氏帝

有虞氏夏禹王商湯王周武王漢高祖皇

帝漢光武皇帝唐太宗皇帝宋太祖皇帝

分五室室太牢一禮三獻樂七奏舞八佾

從祀名臣風后力牧臯陶夔龍伯夷伯益

伊尹傳說周公旦召公奭太公望召穆公

虎方叔張良蕭何曹參陳平周勃鄧禹馮  
異諸葛亮房玄齡杜如晦李靖郭子儀李  
晟曹彬潘美韓世忠岳飛張浚凡三十二  
人列兩廡廡二壇壇少牢一先是洪武元  
年祀三皇用太牢勾芒祝融風后力牧配  
四年令天下立三皇廟歲春秋祭已而令  
祭於陵是年命官參考歷代聖帝賢王但  
在中原安養人民者三十四君合祀之擇

名臣從祀六年禮官言古帝王有父子祖  
孫一廟合祭非禮令別立歷代帝王廟同  
堂異室歲春秋祀三皇五帝禹湯文王武  
王漢高祖光武唐高祖太宗宋太祖元世  
祖其守成賢君令所在有司歲春秋祭於  
陵七年塑帝王衮冕坐像 上曰伏羲神  
農未有衣裳之制勿加冕服已而郊祀祔  
祭諸帝王省春祭歲仲秋遣官祭於廟二

十年以武成王從祝帝王廟去王號罷故  
廟祀二十一年禮官擇上歷代名臣始終  
全節者三十五人從祀帝王廟 上曰趙  
普負太祖不忠不可祀元木華黎安童祖  
也不可祀孫而去祖可祀木華黎罷安童  
祀祀伯顏阿朮可勿祀又曰漢陳平馮異  
宋潘美皆宜祀未幾 上曰文王雖基周  
命終守臣節唐高祖有天下本太宗力也

可勿祀祀於陵增祀隋文帝是年廟火改建于欽天山之陽去隋文帝子午卯酉年傳制祭陵停廟祭嘉靖九年罷歷代帝王南郊從祀禮官請加南京廟春祭上不從令建廟京師歲仲春秋祭南京祭罷十年春廟未成今皇帝祀之文華殿廟初成今皇帝至廟祭是年修撰姚涑請罷元世祖祀禮官議不可上從禮官議二

十四年給事中陳棐又言之乃罷祀元世祖并罷從祀木華黎五人

六十八

外戚封公自嘉靖始也張鶴齡嗣壽寧伯進侯又以迎立今皇帝進封昌國公慶雲長寧孝肅太后家二侯伯瑞安崇善安仁孝貞皇后家三侯伯惟延齡兄弟公侯最貴盛得禍亦最慘

六十九

駙馬無封侯者灤城富陽永春西寧皆以  
軍功封惟永康公主駙馬崔元以迎立  
今皇帝封京山侯 孝陵少公主駙馬趙  
輝天順中求封侯不得

七十

洪武十九年 大誥三編俱成二十八年  
始令法司擬罪引大誥減等蓋因 大誥

初序末有云一切官民諸色人等戶戶有  
此一本若犯笞杖徒流罪名每減一等無  
者每加一等故也然至今但有減等而無  
加等

七十一

開國公臣常李鄧湯劉五姓嘉靖中續封  
甚愜人情但李太師之後不沾一命尚爲  
缺典

七十二

孝烈皇后將葬 上念西苑之變 孝烈  
有大功欲葬於 孝潔皇后之左已而中  
止 上新作壽陵至是定名永陵令先葬  
后 上曰孝陵長陵先葬 孝慈 仁孝  
也

七十三

成祖於建文己卯七月起兵靖難宸濠亦

以正德己卯六月反湖廣二閣老皆石首  
人文定永樂甲辰文簡嘉靖甲辰入閣所  
事 二帝皆藩王入繼大統永樂辛丑四  
月 三殿災嘉靖辛丑四月 九廟災

七十四

聖祖開科詔務求博古通今之士乃所試  
僅有判語及一二時務策生徒竟未識  
大明律所云時務盡掇述括帖以故士乏

通今之學其於政體得失人材優劣且不  
論只 歷朝紀年及 后姓陵名知者亦  
鮮近二十年來士大夫始以通今學古爲  
高矣

七十五

入內閣爲輔臣預機務特避丞相名耳實  
始於建文四年長陵即位之初閣中有文  
淵閣印印文玉箸篆惟封上詔草題奏揭

帖用之不得下諸司下諸司以翰林院印  
凡入內閣云直文淵閣即官至三殿二閣  
二坊大學士無入內閣旨不得與機務也  
雖編修贊善等官有入內閣旨亦得預機  
務矣文淵閣在禁中徐武功署銜自稱掌  
文淵閣事可乎

七十六

我朝 帝后尊謚皆有孝字惟 景皇汪

后無孝字文臣無謚孝者國初惟贈東海  
侯陳文字孝勇

七十七

春秋謹華夷之辨中國有主也文中子帝  
元魏未爲非 聖祖功德高百王詔文嘗  
稱曰天命真人於沙漠帝王廟中以元世  
祖與三皇五帝三王漢高光唐宗宋祖並  
祀真聖人卓越之見

七十八

吳元年冬 孝陵念七子漸長宜習勞令  
內侍製麻履行藤凡諸子出城稍遠馬行  
十七步行十三七子懿文太子秦愍王晉  
恭王 成祖周定王楚昭王齊庶人也

七十九

正德時神英封涇陽伯本無大功江彬平  
虜伯許太安邊伯武德永壽伯以義兒故

得封彬誅死太謫戍邊英德及太監家七  
伯皆革

八十

嘉靖己酉應天試錄策言初開內閣所用  
七人者皆修撰編修檢討等官然不言當  
時七人者惟文穆修撰文敏編修耳大紳  
起謫胥爲待詔文簡中書舍人文貞齊王  
府審理副陞編修文靖給事中若思桐城

知縣陞檢討非由翰林者亦入內閣也

八十一

國初郊廟社稷先農爲大祀已而改先農及山川帝王先師旗纛爲中祀諸神小祀今皇帝以朝日夕月天神地祇爲中祀大祀致齋三日中祀二日祀有牲牲四等曰犢曰牛曰太牢曰少牢色尚騂或黝天地日月加玉焉玉三等曰蒼璧曰黃琮曰

玉牲大祀入滌九甸中祀三甸小祀一甸  
殺禮不用牲用果脯從其族也或用素羞  
祀有帛大祀中祀京師用制帛制帛五等  
曰郊祀曰奉先曰禮神曰展親曰報功小  
祀素帛禮佛帛王國司府州縣亦用帛小  
祀則否凡祀有樂樂四等曰九奏曰八奏  
曰七奏曰六奏奏樂有歌有舞歌堂上舞  
堂下舞皆八佾佾有文有武先師六佾佾

去武小祀則否凡助祭文臣五品武臣四  
品以上嘉靖中都給事中乞得助祭帝社  
稷無助祭大臣五六人陪拜焉小祀則否

八十二

洪武十七年大明清類天文分野書成凡  
二十四卷詔賜秦晉燕周楚齊六府是書  
刻在南雍余嘗託友人印刷友人言此非  
我朝書殆前代人所纂或出山野小說家

洪武中止有今南京爲京師何以此書乃  
有北京又言南京應天府若前代書何以  
又有十二布政司布政司古未有也余曰  
是洪武中書無疑此時未有貴州布政司  
而有北平又洪武元年詔以應天爲南京  
大梁爲北京矣

八十三

懿敬太子妃常氏

懿文太子元配也建

文帝追尊爲孝康皇后 武宗母張后尊  
謚亦孝康皇后

八十四

洪武癸亥賜六部尚書馬已巳賜有司方  
面官馬諭兵部試尚書茹瑞曰布按二司  
官方面重臣府州縣官民之師帥跨驢出  
入非所以示民或假馬部民因被浸潤不  
能舉職甚乖治體其官爲市馬司二十匹

府半之州縣又半之馬一率十戶食之歲  
一更

八十五

宣德七年大學士張瑛乞增南北兩京七  
品以下官俸正統元年副都御史吳訥言  
洪武間京官俸全支後因營造減省遂爲  
例近小官多不能贍如廣西道御史劉準  
由進士授官月支俸米一石五斗不能養

其母妻子女貸同道御史王裕等刑部主  
事廖謨等俸米三十餘石去年病死竟負  
無還乞下廷議增俸

八十六

洪武五年罷孟子配享文廟踰年 上曰  
我聞孟子辯異端闢邪說發明孔子之道  
宜祀如故二十九年罷楊雄從祀祀董仲  
舒正統二年進胡安國蔡沉真德秀從祀

八年追封吳澄爲臨川郡公從祀成化二  
年追封仲舒爲廣川伯安國建寧伯沉崇  
安伯德秀浦城伯弘治八年追封楊時爲  
將樂伯從祀嘉靖九年改大成至聖文宣  
王爲至聖先師孔子四配爲復聖顏子宗  
聖曾子述聖子思子亞聖孟子從祀及門  
弟子稱先賢左丘明以下稱先儒去塑像  
設木主盡罷公侯伯諸封爵申黨申棖二

人存根去黨公伯寮秦冉顏何荀况戴聖  
劉向賈逵馬融何休王肅王弼杜預吳澄  
十三人罷祀林放蘧瑗鄭玄鄭衆盧植服  
虔范甯七人祀於其鄉進后蒼王通胡瑗  
歐陽修陸九淵從祀改稱大成殿爲先師  
廟大成門爲廟門別立祠祀齊公叔梁紇  
稱啓聖公孔氏以顏無繇曾點孔鯉孟孫  
氏配稱先賢程珦朱松蔡元定從祀稱先

儒撤無繇點鯉從祀

八十七

永樂十八年論營建北京功陞營繕郎中  
蔡信爲工部右侍郎所副七人爲所正丞  
六人爲所副匠二十三人爲所丞賜督工  
群臣及兵民夫匠鈔椒蘇木有差正統年  
間營建三殿兩宮包砌京城及修造各衙  
門陞除匠宦不過五六人

八十八

國初都金陵以西北胡戎之故列鎮分封  
似乎過制當時已有葉居升輩漢人七國  
之慮今考廣寧遼王大寧寧王宣府谷王  
大同代王寧夏慶王甘州肅王皆得專制  
率師禦虜而長陵時在北平為燕王尤  
英武稍內則西安秦王太原晉王亦時時  
出兵與諸藩鎮將表裏防守孝陵崩少

裁抑而齊黃諸臣受禍矣肅王今移蘭州

八十九

洪武六年武官一萬二千九百八十八人九年擇功臣子耿璣等一百四人爲散騎舍人十一年選武臣子弟入國子學讀書十四年令公侯武臣皆遣子弟入國子學受業二十一年頒武臣大誥又頒八條勅諭武臣又頒武臣訓戒錄又賜武臣保身勅

二十二年禁武臣預民事二十三年賜公  
侯伯屯戍百戶二十六年頒稽制錄於諸  
功臣二十九年大賚致仕武臣各陞一級  
銓於甘肅大同北平大寧遼東諸衛所凡  
千五百人

九十

嘉靖九年更定南北郊禮南郊 皇天上  
帝南向 太祖西向東一壇大明西一壇

夜明東二壇二十八宿西二壇雲師雨師  
風師雷師址郊 皇地祇址向 太祖西  
向東一壇中嶽東嶽南嶽西嶽址獄基運  
山翊聖山神烈山西向西一壇中鎮東鎮  
南鎮西鎮址鎮天壽山純德山東向東二  
壇東海西海南海北海西向西二壇大江  
大淮大河大漢東向

天壽七陵惟景陵規制獨小嘉靖丙申稍廓大之是年作壽陵即永陵也在天壽迤東十八道嶺夫君即位爲禪禮也昔漢文帝表灑西唐太宗營九巖我二祖先作二陵故並獲吉壤今皇帝因謁七陵遂有壽宮之役真達天高世之見

九十二

洪武二年立功臣廟於鷄鳴山論功列祀

二十一人命死者塑其像生者虛其位是時胡大海馮國用趙德勝耿再成丁德興俞通海張德勝茅成八人先棲神於卞蔣等廟乃塑像移祀於此徐常李鄧湯沐六王及華高吳良吳楨曹良臣康茂才吳復孫興祖尚存但虛其位洪武二年太廟侑享初有廖永安凡十三人永安俞通海張德勝乘世傑耿再成胡大海趙德勝七

人已卒祀廟中九年始加封號贈謚罷永安祀時徐常李鄧湯沐六王侯其卒進侑皆太祖所親定也然功臣廟無廖永安乘世傑而太廟乃有之馮國用丁德興茅成華高吳良吳楨曹良臣康茂才吳復孫興祖祭於功臣廟而太廟侑享不與焉此太祖之權衡度量非後人所能測識也昔西漢定元功十八人位次東漢雲

臺三十二人唐凌烟二十四人宋昭勳崇  
德十人皆託褒揚於位貌而已太  
祖之廟庭侑享則以血食寓褒揚其報最  
重其禮最隆矣嘉靖十六年郭勛欲進祀  
其立功之祖武定侯英於太廟乃倣三  
國志俗說及水滸傳爲國朝英烈記言生  
擒士誠射死友諒皆英之功傳說宮禁動  
人聽聞已乃䟽乞祀英於廟廡又言英本

開國功臣卒於永樂年間以故不廟祀而不知太祖定廟祀時固兼生死而論定矣且英之封在洪武十七年論平雲南功大將潁川侯傅友德進封潁國公副將藍玉仇成王弼先封流侯者與世嗣偏裨都督僉事陳桓胡海郭英張翼兵興以來屢効勤勞今勲尤著於是桓封普定侯海東川侯英武定侯翼鶴慶侯蓋廟祀定後十

六年而英始侯也

九十三

侑廟功臣位次中山王十二人洪武年定  
河間王四人洪熙年定皆序封爵首王次  
公次侯開國功臣靖難功臣各自爲序嘉  
靖丁酉進誠意伯位六王之下群公之上  
以爲不倫及營國公郭英進祝并兩朝功  
臣敘爵於是營國公列永義侯之上誠意

伯列寧國公之下矣

九十四

嘉靖十四年二月羣臣於東閣集議大行  
莊肅皇后謚大學士孚敬首曰 莊肅皇  
后與累朝事體不同其謚只諉二字四字  
尚書言曰今各廟元后俱十二字恐二字  
四字未稱大學士時曰二字四字大少須  
得八字都御史廷相曰 莊肅作配 武

宗謚宜一體吏部侍郎韜曰謚者天下之  
公非天子自行之宜備陳以請乃上議言  
古人尚質謚法尚簡嚴故稱美之言無幾  
後世帝后之謚始有不一其書者亦臣子  
尊崇之情生今之世則當行今之禮我朝  
列聖元后謚皆十二字蓋大行盛名

后媿美妻以夫尊禮宜與並今武宗

謚既與列聖相同則莊肅謚號似亦

不宜稍異且今日加謚祇以表行尊名其  
於服制有無名分尊卑本不相涉 上曰  
事嫂如事母人道有此乎非朕自尊 兩  
宮在上 昭聖皇太后有母道宜再會議  
議上宜且據謚法止用二字候他日再加  
徽號以備全典 上曰用六字謚 孝靜  
莊惠安肅毅皇后數旣用半且陰六又合  
嘉靖十五年四月 上坐天壽山行宮面

諭言曰皇嫂孝靜皇后謚用六字於禮未  
備還用全謚庶合典禮九月 上御文華  
殿面授言御筆定謚孝靜皇后爲 孝靜  
莊惠安肅溫誠順天偕聖毅皇后

九十五

弘治十一年三月監生江瑤奏言劉徎李  
東陽杜絕言路掩蔽聰明妬賢嫉能排抑  
勝已急宜斥退徎東陽疏言近日兩京科

道指陳時弊并劾奔競交結乞恩傳奉等  
官雖未盡當類多可採而乃漫無可否槩  
下施行自 祖宗朝至今未有此事皆臣  
等因循將順苟避嫌疑不能力贊乾剛俯  
從輿論別白忠邪明正賞罰以致人心惶  
惑物議沸騰草野之下其言乃至於此乞  
罷 上不許下瑤詔獄徒等又上疏力救  
容得釋

九十六

南京設叅贊機務自戶部尚書黃忠宣公始實宣德乙卯也已而黃公兼掌兵部事正統五年代黃公者兵部侍郎徐琦正統十四年琦陞尚書景泰元年止掌部事靖遠伯代琦總督機務成化間崔莊敏公以南東書王端毅公以南右都御史叅贊機務恐亦未然又云始於正統辛酉亦非蓋

正統辛酉始定名南京也

九十七

永樂五年七月辛卯以成國公朱能爲征夷將軍總兵官西平侯沐晟新城侯張輔左右副將軍豐城侯李彬雲陽伯陳旭左右叅將大將軍率右副將軍右叅將及清遠伯陳友統神機將軍程寬朱貴等遊擊將軍毛八丹朱廣王恕等橫海將軍魯麟

王玉商鵬等鷹陽將軍呂毅朱吳江浩方  
政等驃騎將軍朱榮金銘吳旺劉劄出等  
二十五將軍以兩京畿荆湖閩浙廣東西  
兵出廣西憑祥左副將軍左叅將統都指  
揮陳睿盧旺等以巴蜀建昌雲貴兵出雲  
南蒙自兵部尚書劉儁叅贊戎務行部尚  
書黃福大理卿陳洽轉餉征交趾

洪武至宣德六十八年間登極立中宮

東宮及上慈闈尊號徽號詔皆無文

武官封贈廕子試署實授恩例英宗登極詔始令署都督僉事事都指揮署都指揮僉事事指揮實授景皇登極詔始令在

京文官及在外方面官一考無贓犯者照洪熙宣德年例與誥勅景泰三年立懷獻太子詔始令署郎中員外郎主事試中書

實授又與土木死事諸臣誥勅封贈廕子  
入監不願入監者聽天順復辟詔始令內  
外文武署職試職因功陞授者與實授天  
順八年兩宮徽號詔始封兩京文武七  
品以上官父母署職試職實授成化二十  
三年上慈闈尊號詔兩京文武官七品  
至四品先封父母三品以上與誥命恭陵  
登極詔內外文官署職試職實授內外武

官天順八年正月以前功陞試職署職遇  
例實授該世襲者子孫仍襲其未實授及  
以後功陞試職署職實授弘治五年立  
東宮詔文武官試職署職年半以上者實  
授不及年半者扣至實授弘治十一年清  
寧宮災詔兩京文官署職試職理刑者實  
授歷任未及一考者與誥勅其誥勅准給  
未領因事降調非貪淫酷刑者仍給與弘

治十八年上 兩宮尊號詔文武官署職  
試職實授兩京七品以上文官未及一考  
與誥勅父母已封者服色許與子同 今  
上登極詔正德十四年文武官負人等因  
諫止巡遊跪門責打降級改除爲民充軍  
者該部具奏起取復職酌量陞用打死者  
追贈諭祭仍廕子入監讀書充軍故絕者  
一體追贈諭祭優養親屬嘉靖元年 尊

號詔兩京文官未一考者與誥勅父母已封者服色許與子同誥勅准給未領因事降調非貪淫酷刑者仍給與嘉靖九年

大報禮成詔兩京文官未及一考無過者給與誥勅嘉靖十九年 皇子生詔始令

兩京三品上文官例該廕子未及一考者廕子入監兩京文官未及一考者在外七品以上歷任三年無過者與誥勅文官五

品以上武官四品以上署職試職者并試  
職御史實授仍與誥勅十五年立 東宮  
詔兩京三品上文官廕子兩京文官未及  
一考者在外七品以上官歷任三年無過  
者與誥勅兩京文武官署職試職實授仍  
與誥勅十七年 郊廟大禮成詔兩京文  
職并在外五品以上方面有司四品官未  
及一考者與誥勅兩京文武官并新舊武

舉官署職試職實授仍與詔勅十八年立  
東宮兩京文職三品上官與誥勅廕子二  
十四年 宗廟成詔兩京文官未及一考  
與誥勅署職試職實授仍與誥勂愿馳封  
者聽

今言卷之一終